



partii naleraq

Nuuk, 20. april 2015

Anthon Frederiksen

UPA2015/33

Naalagaaffiit Peqatigiit meeqqat pillugit isumaqatigiissutaata ilanngunneqarnissaa pillugu kingusinnerpaamik 2016-mi ukiakkut ataatsimiinnermi Inatsisartut inatsisaattut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Aaja Chemnits Larsen, Inuit Ataqatigiit)

Siullermeerneqarnera

Inatsisartunut ilaasortap Aaja Chemnitz Larsenip siunnersuutaa Partii Naleqqamiit imannak oqaaseqarfigissuarput.

Partii Naleqqamiit aallaqqaasiullugu erseqqissassuarput Partii Naleqqamiit meeqqat inuusuttullu pisinnaatitaaffiisa inatsisitigut pitsaasumik toqqammaveqarlutik illersorneqarnissaat assut pingaartikkatsigu.

Taamaammallu aamma Nalagaaffiit Peqatigiit meeqqat pillugit Isumaqatigiissutaata 1992-imi nunatsinnut atortussanngortinneqarsimanerata kingunerisaanik inatsisitigut isumaqatigiissummut qulaani taaneqartumut naleqqussaajuarnissaq pisariaqarluinnartoq takusinnaallutigu, minnerunngitsumik aamma nunatsinni inatsisiliornikkut inatsisinilluunniit allannguinnikkut isumaqatigiissummut naapertuuttumik aaqqissuussisarnissaq pisariaqarmat.

Taama oqareerluta aamma eqqaanngitsoorsinnaanngilarput suut tamarmik illua-tungeqartarmata, tassa pingaarnertut angajoqqaat meeqqaminnut pisussaaffii aamma ukiorpassuarni eqqartorneqartartut.

Tassami meeqqat inuusuttuaqqallu pisinnaatitaaffii ajunngeqaat illersorneqartariaqarlutillu, kisianni aamma angajoqqaat meeqqaminnut pisussaaffii eqqarsaatigalugit, aamma suli meerarpassuaqarpoq nammineq pisuussutiginnngisaminnik angerlarsimaffiup avataanut aningaasarparujussuit atorlugit inissinneqartariaqartartunik.

Taamaattumik meeqqat pisinnaatitaaffiisa inatsisitigut naleqqussartuarnissaat pingaaruteqaraluaqisoq, taamaattoq aamma meeqqat ulluinnarni atugaasa suli pitsaanerulersinneqarnissaat pisariaqarlunnartoq Partii Naleqqamiit isumaqarpugut.

Kisianni aamma meeqqat pisinnaatitaaffii maani nunatsinnut kultur-itsinnut naliginnaasumillu ulluinnarni inuunitsinnut naleqqussarnissaat pingaaruteqartorujussuusoq Partii Naleqqamiit isumaqarpugut.

Aamma Meeqqat illersuisuata nalunaarutaa eqqarsaatigalugu takuneqarsinnaavoq meeqqat illersuisuata maannamut illoqarfiit 14-it tikissimagai, kisiannili nunaqarfiit suli maannamut tikinneqarsimangitsut.

Taamaattumik Partii Naleqqamiit aamma meeqqat nunaqarfinniluunniit najugaqaraluarpata tamarmik assigiimmik pisinnaatitaaffeqarnissaat aamma qulakkeerneqartariaqartoq isumaqarpugut.

Tassami Partii Naleqqamiit meeqqat ajunngitsumik kusanartumillu perorsarneqarnerannut atatillugu meeqqat ilinniartinneqarnerat inuiaqatigiinni pisussaaffeqarnermut akisussaassuseqarnermullu atatillugu, minnerunngitsumillu aamma inoqatinut ataqqinninnermik ilinniartinneqarnerunissaat Partii Naleqqamiit manna iluatsillugu oqaatigineqartariaqartoq isumaqarpugut.

Tassami meeqqat atuarfiini pissutsit ullumikkut qiviarutsigit isiginngitsuusaarsinnaangilarput ilinniartitsisut ilungersungarlutik tiimit aallartinnerini naalatsitsiniarnernut immaqaluunniit eqqornerusumik oqaatigalugu ilinniartitsisut inunnik isumaginnittut suliassaannik piffissarujussuaq atorlugu suliaqartarnerat aamma arlaatigut aaqqiivigineqartariaqartoq Partii Naleqqamiit isumaqarpugut.

Siunnersuutip qulequtaanut aamma Naalakkersuisut allannguutissamik siunnersuutaanut tunngatillugu Partii Naleqqamiit pissusissamisoornerpaatut isumaqarpugut qulequttat taakku ataatsimiititalimi susassaqarfiusumik eqqartorneqarpata.

Taamatut oqaaseqarluta siunnersuutip aappassaaneerneqannginnerani ataatsimiititaliami sularineqarnissaa inassutigaarput.